

摘藻堂四庫全書薈要

子部

欽定四庫全書

子部

御定淵鑑類函卷一百五十七

八

欽定四庫全書薈要卷一萬一千六百五

子部

御定淵鑑類函卷一百五十七

禮儀部四

藉田

親蠶

藉田一

禮經考索曰王者以民為天民以食為天此耕藉之

禮所不可廢也是禮也唐虞至詳夏商則罕見於經至  
於周人則其禮獨詳焉然周人之禮莫詳於詩莫備於  
禮記秦漢以來此禮雖誦或者謂月令所載天子躬耕

帝藉之事秦人之禮也魏晉承漢之後其他事多戾於古獨藉田一禮不敢廢墜焉良以國以農為重不有以親率之則無以教天下舍末而趨乎本歟六朝之際此禮尤重隋唐因之未嘗闕典五代兵革臨難之餘泯沒不載至宋朝以恭儉禮下以仁厚撫民立國之初未遑他務而二聖相繼以藉田之禮為先務中興議和之後禮樂文物具舉而藉田一事亦不敢緩豈不以此禮可以通百祀而不可廢也耶原說文曰帝藉千畝者使

民如借故謂之藉 毛詩曰載芟春藉田而祈社稷也

載芟載柞其耕澤澤千耦其耘徂隰徂畛侯主侯伯侯  
亞侯旅侯彊侯以有飡其饁思媚其婦有依其士有略  
其耜俶載南畝 周官曰上春詔王后帥六宮之人而  
生種稷之種而獻之于王 又曰甸師掌帥其屬而耕  
耨王藉以時入之以供粢盛 禮記曰孟春之月天子  
乃以元日祈穀於上帝乃擇元辰天子親載耒耜帥三  
公九卿諸侯大夫躬耕帝藉天子三推三公五推卿諸

侯九推反執爵於太寢命曰勞酒 又曰天子親耕於

南郊諸侯耕於東郊 又曰昔者天子為藉千畝冕而

朱紘躬秉耒諸侯為藉百畝冕而青紘躬秉耒以事天

地山川社稷先古以為醴酪粢盛於是乎取之敬之至

也 增祭義曰耕藉所以教諸侯之養也 表記曰天

子親耕粢盛秬鬯以事上帝故諸侯勤以輔事於天子

注言無事而居位食祿是不義而富且貴 禮記外傳

曰藉者借也天子耕千畝但三推發耒三岱而止借民

力治之所耕之穀藏于神倉以供事天地宗廟神祇人  
鬼之用也天子以身先天下以建寅之日而郊郊而後  
耕郊用辛日而耕用亥日享先農而後藉田 原五經  
要義曰天子藉田千畝孟冬啓蟄既郊之後率公卿大  
夫而親耕焉所以先百姓而致孝敬 論衡曰立春東  
耕為土象人男女各二人秉耒把鉏或立土牛象人土  
牛未必能耕也順氣應時示帥下也 國語曰宣王即  
位不藉千畝號文公諫曰夫民之大事在農上帝之粢

盛於是乎出民之蕃庶於是乎生事之供給於是乎在

財用蕃殖於是乎始先時九日太史告稷曰陽氣俱蒸

土膏其動即以告王王即御事王耕一墾班三之庶人

終乎千畝王不聽師敗於姜戎也

賈逵注一墾一耦之發也耦廣五寸二耦

為耦一發廣尺也班次也三之謂公卿大夫也

增左

王之下各三其上公三發卿六發大夫九發

傳桓十四年八月御廩灾

注御廩公所親耕以奉粢盛之倉也

又昭十

八年邠人藉稻

注其君自出藉稻蓋履行之疏耕種于藉田

公羊傳注天

子親耕東田千畝諸侯百畝

穀梁傳甸粟而納之三



宮三宮米而藏之御廩

疏諸侯夫人三宮

魯語曰入監九御

使潔奉禘郊之粢盛

楚語王后必自舂其粢天子親

舂禘郊之盛

白虎通耕于東郊東方少陽農事始起

桑於西郊西方少陰女功所成故曾子問曰天子耕東

田而三反之

原漢書文帝二年春正月丁亥詔曰夫

農天下之本其開藉田朕親率耕以給宗廟粢盛東

觀漢記曰永平十三年二月耕藉田畢賜觀者食有一

諸生前言善哉文王之遇太公也上書版曰生非太公

予亦非文王 漢舊儀春始東耕于藉田祠先農以一

牢應劭漢官儀曰天子升壇公卿耕訖嗇夫下種藉

田亦曰帝藉亦曰耕藉亦曰東耕亦曰親耕亦曰王藉

又曰東耕之日親率公卿戴青幘載青車駕蒼馬公

卿以下車駕如常法 增漢書文帝二年詔曰農者天

下之本也民所恃以生也而民或不務本而事末故生

不遂朕憂其然故今茲親率羣臣農以勸之其賜天下

民今年田租之半十二年詔曰道民之路在于務本朕

躬率天下農十年于今詔書數下歲勸民種植而功未興是吏奉吾詔不勤而勸民不明也且吾農民甚苦而吏莫之省將何以勸焉其賜農民今年租稅之半十三年詔曰朕親率天下農耕以供粢盛皇后親桑以奉祭服其具禮儀又詔曰農天下之本務莫大焉今墮身從事而有租稅之賦是本末者無以異也其於勸農之道未備其餘田之租稅 昭帝始元元年春二月己亥上

耕於句盾弄田

應劭曰帝時九歲未能躬耕藉田句盾宦者近舍故往試耕為戲弄也臣瓚曰

西京故事弄田在未央宮中師古曰弄田謂游宴  
之田天子所戲弄耳非為昭帝年幼創有此名

百

官表大司農屬官有藉田令丞

通典宋志漢文帝初立藉田置令丞

食

貨志文帝即位躬脩儉節思安百姓時民近戰國背本

趨末賈誼說上曰歐民歸之農皆著於本則蓄積足而

民樂上感誼言始開藉田躬耕以勸百姓 禮樂志郊

祀歌條理信義望禮五嶽藉斂之時掩收嘉穀注謂收

藉田也 後漢書陳忠傳藉田之耕起於漢文 又帝

紀明帝永平四年春二月辛亥詔曰朕親耕藉田以祈

農事比再得時雨宿麥潤澤其賜公卿半奉有司勉遵  
時政務平刑罰十三年春帝耕於藉田禮畢賜觀者食  
章帝元和二年二月乙丑帝耕於定陶詔三老孝弟  
力田賜帛人一疋勉率農功 禮儀志正月始耕晝漏  
上水初納執事告祠先農已享耕時有司請行事就耕  
位天子三公九卿諸侯百官以次耕力田種各耰訖有  
司告事畢是月令曰郡國守相皆勸民始耕如儀諸行  
出入皆鳴鐘皆作樂其有災眚它故若請雨止雨皆不

鳴鐘不作樂注春秋釋病曰漢家郡守行大夫禮鼎俎  
籩豆工歌縣何休曰漢家法陳師置守相故行其樂也  
黃瓊傳自順帝即位不行藉田之禮瓊上疏奏曰先  
王制典有日司徒咸戒司空除壇先時五日有協風之  
應王即齊宮享醴載耒重之也書奏從之輿服志芝

車上親耕所乘注東京賦曰農輿路輅木賀循曰漢儀

親耕青衣幘左太冲魏都賦藉田以禮動大閱以義

舉晉書禮志禮孟春之月天子躬耕帝藉漢文帝始

行斯禮魏之三祖亦皆親耕及武帝泰始四年詔曰古  
之聖王躬耕帝藉以供郊廟之粢盛且以訓化天下近  
世以來耕藉止於數步之中空有慕古之名曾無供祀  
訓農之實而有百官車徒之費今脩千畝之制當與羣  
公卿士躬親稼穡之艱難以帥先天下主者詳具其制  
下河南處田地於東郊之南洛水之北於是乘輿御木  
輅以耕以太牢祀先農又曰武帝末有司奏古諸侯  
耕藉百畝躬執耒以奉社稷宗廟以勸率農功今諸侯

臨國宜依脩耕藉之義竟未施行 晉書帝紀武帝泰

始四年春正月丁亥帝耕於藉田戊子詔方今陽春養

物東作始興朕親率王公卿士耕藉千畝將以務本惠

育海內其大赦天下 又食貨志是時江南未平朝廷

厲精於稼穡泰始四年帝親耕藉田詔曰使四海之內

競務農功者惟郡縣長吏乎 又溫嶠傳明帝即位奏

軍國要務其五曰古者親耕藉田以供粢盛舊制藉田

廩犧之官今臨時市求非所以虔奉宗廟宜如舊制立



此二官 宋書禮志曰元嘉二十年太祖將親耕而其儀久廢使何承天撰定儀注乃下詔曰國以民為本民以食為天古者後時服土以訓農工躬耕帝藉敬供粢盛仰瞻前王思遵令典便可量處千畝考上元辰朕當親率百辟致禮郊甸庶幾誠素光被斯民 又曰藉田皇帝冠通天冠朱紘青介幘朝服青紗袞侍中陪乘奉車郎秉轡 又曰車駕至藉田侍中跪奏尊降車臨壇大司農跪奏先農已享請皇帝親耕太史令讚曰皇帝

親耕三推三反於是羣臣以次耕王公五等開國諸侯  
五推五反公卿大夫七推七反士九推九反藉田命率  
其屬耕竟畝灑種即耬齊書禮志曰永明三年有司

奏來年正月二十五日丁亥可祀先農即日輿駕親耕  
宋元嘉大明以來並用立春後亥日尚書令王儉以為  
亥日藉田經紀無文太學博士劉蔓議禮孟春之月立  
春迎春又於是月以元日祈穀又擇元辰躬耕帝藉盧  
植說禮通辰日日甲至癸也辰子至亥也郊天陽也故

以日藉田陰也故以辰陰禮畢後必居其末亥者辰之  
末故記稱元辰注曰吉亥又五行之說木生於亥亥日  
祭先農又其義也何譚之議鄭注云元辰蓋郊後吉亥  
也何佟之議丁亥自是祭祀之日不專施于先農漢文  
用此日耕藉祀先農故後王相承用之顧嵩之議昭帝  
癸亥耕弄田明帝癸亥耕下邳章帝乙亥耕定陶又辛  
丑耕懷魏之烈祖實書辛未不繫一辰 齊樂志漢章  
帝元和元年玄武司馬班固奏用商頌載芟祠先農晉

傅玄作祀先農先蠶夕牲歌詩一篇八句迎送神一篇  
饗社稷先農先聖先蠶歌詩三篇辭皆叙田農事胡道  
安先農享神詩一篇樂府相傳舊歌三章永明四年藉  
田詔江淹造藉田歌二章付太樂歌之羽鑾從動金駕  
時遊率先丹耦躬導綠疇瓊竿既飾繡簋以陳方燮嘉  
種永毓宵民 齊永明四年正月甲寅藉田禮畢幸閱  
武堂勞酒小會賜帛有差 梁天監十三年二月丁亥  
以啓蟄而耕十六年二月辛亥耕晉通二年四月丙辰

徙藉田於東郊外十五里築兆域如南北郊別有望耕  
臺在壇東親耕畢登此臺以觀公卿之推又有祈年殿  
四年二月躬耕賜爵勞酒 梁五禮藉田儀注其田東  
去宮八里遠十六里為千畝天子耒耜一具公耒耜三  
具卿侯耒耜九具立方壇以祀先農 隋書禮志曰北  
齊藉于帝城東郊千畝作祠壇于阡東陌西又設御耕  
壇于阡東陌北每歲正月上辛後吉亥使公卿以一太  
牢祠先農氏于壇上祭訖親耕 隋制于國南十四里

啓夏門外置地千畝為壇孟春吉亥祭先農于其上牲  
用一太牢皇帝備法駕三獻訖因耕司農授耒皇帝三  
推訖各以班九推五推而司徒帥其屬終千畝播植九  
穀納于神倉 隋禮志大同五年又築雩壇於藉田兆  
內有祈禳則齋官寄藉田省云 會典貞觀二年春太  
宗親祭先農躬御耒耜藉于千畝之甸初晉氏南遷後  
魏來自雲朔中原分裂又雜以獮戎迨及周隋此禮久  
廢而今始行之觀者莫不駭躍於是秘書郎岑文本獻

藉田頌以美之 儀鳳二年正月乙亥親耕藉田于東郊禮畢作藉田賦以示羣臣三年五月幸藉田所觀區種手種數區 玄宗欲重勸耕藉進耕五十餘步其儀備開元禮 開元十九年耕于興慶宮龍池親耕三百餘步 又開元二十二年正月上親耕于洛陽東門外諸儒奏議以為古者以一墦為推今用牛耕宜以一步為推上乃親藉太常告三推禮畢上曰朕憂人知勤勞俯同九推而止自是公卿以下皆過于古 開元二十

三年正月親祀先農禮畢降至耕位侍中執耒太僕秉轡上謂左右曰帝藉之禮古則三推朕今九推庶九穀之報也 乾元二年正月戊寅有事于藉田上行九推禮官奏太過曰朕勸農率下所恨不終千畝耳禮畢雪盈尺 憲宗元和五年詔以來歲正月藉田太常修撰常公肅言藉田禮廢久矣有司無可考乃據禮經參採開元乾元故事為先農壇于藉田高五尺廣五丈四出陞其色青草具其儀以水旱用兵而止 禮樂志皇帝



孟春吉亥享先農遂以耕藉前享一日奉禮設御座於壇東西向又設御耕藉位於外壇南門之外尚舍設御耒席皇帝已享乃以耕根車載耒耜於御者間皇帝乘車自行宮降大次乘黃令以耒耜授廩犧令皇帝出就耕位廩犧令解韜出耒司農卿進受之以授侍中奉以進皇帝受之耕三推皇帝初耕執耒耜者皆以耒耜授侍耕者皇帝耕止三公諸王耕五推尚書卿九推皇帝還入大次太常卿率其屬耕千畝皇帝還宮明日頒勞

酒於太極殿如元會不賀不為壽藉田之穀斂而鍾之神倉以擬粢盛及五齊三酒穰藁以食牲藉田祭先農唐初為帝社亦曰藉田壇貞觀三年太宗將親耕給事中孔穎達議曰禮天子藉田南郊諸侯東郊今帝社乃東壇未合於古太宗曰書稱平秩東作而青輅黛耜順春氣也五方位少陽田宜於東郊乃耕於東郊垂拱中武后改藉田壇曰先農壇

高五尺周四十步者先農之壇

神龍元年

禮部尚書祝欽明議曰周頌載芟春藉田而祈社稷禮

天子為藉千畝諸侯百畝則緣田為社曰王社侯社今  
曰先農失王社之義宜正名為帝社太常少卿常叔夏  
博士張齊賢等奏經無先農禮曰王自為立社曰王社  
先儒以為在藉田也永徽中猶曰藉田垂拱後乃為先  
農與社一神今先農壇請改曰帝社壇以合古王社之  
義其祭準令以孟春吉亥祠后土以勾龍氏配於是為  
帝社壇又立帝稷壇於西如大社大稷而壇不設方色  
以異於大社開元十九年傳帝稷祀神農氏於壇上配

以後稷二十三年親祀神農於東郊配以勾芒遂躬耕  
盡隴止肅宗乾元二年詔去耒耜雕刻命有司改造之  
曰田器樸素豈貴文飾天子出通化門釋輶而入壇遂  
祭神農氏以後稷配冕而朱紘躬九推焉 祭先農樂  
章三奏豐和之舞二變顯慶三年洗馬郭瑜撰 太宗  
遊金明池召田婦數十人於殿上賜席使坐問以民間  
疾苦田婦愚戇無所隱避賜帛遣之 太宗興於側微  
民事固無不知恐富貴而忘之也每臨朝無一日不言

及稼穡 真宗乳母秦國夫人劉氏本農家也喜言農

事真宗自幼聞之故為開封尹以善政著聞及踐大位

咸平景德之治為有宋隆平之極景德農田敕至今稱

為精當 宋雍熙四年十一月禮儀使言御耒耜二具

并緇並飾以青準乾元故事其制如農人所執者不加

雕飾事畢內中尚收之載以耕根車明道二年籍田有

司求太宗所御耒耜準其制以造作而青綾緇依然如

新於是即用舊緇不復更造二月丁未肆赦首言太宗

親耕耒耜敕有司嚴密秘護以表崇奉之意 明道二年正月大禮使以製成御耒耜青箱等奏御二月齊天安殿翌日乘玉輅適耕所司農卿以耕根車載耒耜前行十一日祀畢搢圭秉耒三推侍中前授耒耜于司農卿卿授廩犧令令復耒於緇以授侍耕者 青箱舊無其制用竹木為之無蓋兩頭設襻飾以青中分九隔隔設一種覆以青帊 隋書籍田令以青箱種稌之種跪陳司農詣耕所曬之唐不行此禮 雍熙四年九月辛

已出御札曰王者上事穹蒼下臨黎獻遵執古御今之道推子民育物之心必務稼穡以勸分庶家給而人足朕嗣守大寶惟懷永圖發一言必念生民嘗一膳必思稼穡雖燔柴告類紫壇屢薦於至誠而執耒親耕青輅未行于盛禮其以來年正月擇日有事于東郊行藉田之禮宜令所司詳定儀注以聞是禮廢之久矣制下之日中外歡洽以宰臣李昉為大禮使陳王元僖為橋道頓遞使翰林學士宋白為禮儀使賈黃中為鹵簿使御

史中丞張宏為儀仗使仍命白黃中與蘇易簡詳定儀注按通典乘青輅推黛耜者所以順春氣其方位請在東郊又北齊作壇壇高九尺廣輪三十六尺四陛三壝四門唐制高五尺周回四十步飾以青今請于朝陽門七里之外十五里之內擇地為壇壇高九尺周壝四十步飾以青待詔設兩壝外壝在大次及御耕位觀耕臺樂縣之外禮儀使宋齊言舊禮于先農壇東立觀耕臺帝親耕禮畢登此臺以觀公卿推請築臺高五尺以便



陟降周圍四十步四出陞飾以青皇帝乘玉輅以耕根  
車載耒耜以青箱奉種稂之種從之五年正月癸酉上  
宿齋于乾元殿甲戌鸞駕出宮備大駕鹵簿於丹鳳門  
外帝服通天冠絳紗袍執圭乘玉輅次東郊是夜宿齋  
室乙亥未明三刻帝服袞冕執鎮圭親饗神農氏於壇  
上以后稷配焉禮畢次詣耕藉位行三推之禮有司版  
奏禮畢帝謂侍臣曰朕志在勸農恨不能終千畝豈止  
於三推為限乎遂耕數十步侍臣固請乃止又御觀耕

臺南向坐觀王公耕訖侍臣奏禮畢解嚴還行宮百官  
稱賀上賦東郊藉田五七言詩各一首賜侍臣宴百官  
於大明殿行勞酒禮淳化元年禮官請先農壇各封五  
十步為兩壇壇各五十步 明道二年二月行藉田禮  
罷冬至郊祀藉田所施一準郊例悉用端拱之制而加  
損益焉貢舉人自請陪位許父老縱觀勿令呵止 仁  
宗明道元年十二月詔以來歲仲春涓日行耕藉之禮  
命有司草具儀尚書司封員外郎王舉正太常博士李

淑與禮官詳定儀注七日禮官請就端拱壇位因加脩飾八日請改撰藉田樂章上之付太常習肄甲子有司新製耒耜學士院撰青城諸門及殿名越明年二月丁未行禮李淑等上耕藉類事五卷二月丙午上齋宿于東郊日傍有黃氣如龍鳳丁未服袞冕執圭祀神農后稷于壇乃就耕位搢圭執耒行禮禮儀使張士遜奏三推而止上曰朕既親耕不以古禮為式願耕之終畝以勸天下之農士遜等固請遂耕十有二畦而止帝升觀

耕臺南面坐觀公侯等耕王公以下執耒悉過五九之數藉田令奉種桂之種司農卿受而播之率屬以終千畝帝受賀于受禧殿還御正陽門大赦天下進藉田青牛四下芳林園養之十六日賜百官福酒有差辛亥上作藉田詩賜近臣宋祁上頌曰丙午之旦次于帷宮淳濯圭潔昧明乃頓大次欵嘉壇索先農以享之因太稷以配之乃降靈場儼朱紘紺轅儲駕洪縻序進遂推而進之幾十塲而後釋乃始弭節容與御觀耕之臺王公

羣后班趨以耨邁五踰九大農灑種庶人終畝 學士

院撰享先農登歌樂章 其後景祐作觀稼殿皇祐作

寶岐殿 景祐元年司天監校土牛經書目一卷去其

復重釋牛色等四篇為農事之占命知制誥丁度序之

頒天下其牛色及執策者衣並以歲月支干納音相配

元豐二年十月癸卯詔於京城東南度田千畝為藉

田置令一員以辛公祐兼徙先農壇于其中神倉于東  
南三年十月辛公祐請下有司定耕藉儀注增修鑠麥

殿以備行幸先是五月九日王存等請以南郊鏤麥殿  
前地及玉津園東南茭地并民田共一千百畝為藉田  
外以百畝建先農壇兆開阡陌洴洴建神倉齋宮及耕  
作入牛廬舍之類繪圖上之詔付禮院四年八月藉田  
司言九穀皆稔請修誨觀麥視禾臨幸儀注 紹興十  
五年十一月十七日詔以來歲之春祇祓青壇親載黛  
耜躬三推之禮以風示於四方從司封郎中李澗之請  
也太常討論典故請營建於行宮之南車駕服履袍乘

平輦詣思文殿進膳畢服通天絳紗行親耕之禮耕藉  
鹵簿儀仗依政和新儀用六百八十八人兵部太常以  
地狹請止用其半奏可庚辰九日以宰臣檜為耕藉使  
十六年禮官修定親享先農親耕儀注上之壬辰皇帝  
袞冕親享先農行藉田禮推至七至九百官表賀詔曰  
朕親耕藉田以先黎三推復進勞賜耆老嘉與世俗躋  
于富厚先是上曰詔須語簡意足使民曉然知厚本之  
意時臨安守張澄設靈壇御耦幄殿次舍十五年司農

簿宋樸請令守令以歲仲春出郊勞農遂為故事 親

耕七曲出大次至歸大次並用乾安享先農宮架奏靜  
安之樂儲靈錫羨之舞三成 紹興十六年脩定儀注

前期於觀耕壇上設御幄南向設御座于幄內皇帝升  
觀耕壇宮架樂作樂正升自午階登歌樂作禮畢耕藉  
使升外階立御幄前西向四方館使引陪耕耆老立壇  
下北向皇帝降座登歌樂作至壇下升輦 明會典洪  
武二年定皇帝祀先農畢太常卿奏請詣耕藉位皇帝



至位南向立公侯以下及應從耕者各就耕位戶部尚書北面進耒太常卿導引皇帝耒耜三推戶部尚書跪受耒太常卿奏請復位南面坐三公五推尚書九推各退就位太常卿奏禮畢太常卿導引皇帝還大次應天府尹及上元江寧兩縣令率庶人終畝是日宴勞百官耆宿於壇所

## 藉田二

原紺轅

青幘

上見潘岳藉田賦  
下詳藉田一

青壇

華畢

見潘岳賦  
徐

爰賦曰衍參途之廣闢眇道路之悠遠增華卑之未驚渺同方其已返

千耦 萬轡繆襲

藉田賦詔勾芒使掌歷予敷義仲以農期儀晨祥而舉趾兮樂田祖以幽詩嘉載芟之千耦予美振古之如茲

轉徐爰賦隱千軫以風行闐萬轡而霧白日麗晷乎桑野大駕稅幸乎疆畛三推 千畝

並詳 事天 祈社並詳 教養 致敬禮記耕藉所以教諸侯之

養也 下 載耜 秉耒禮記乃擇元辰天子親載耒耜置之車右公卿諸侯大夫

躬耕藉田注元辰蓋郊後吉辰也 下詳藉一 降靈壇 脩帝藉上見潘岳賦張衡

東京賦乘鸞輅而駕蒼龍介馭間以刈耜躬三推于天田脩帝藉之千畝 給宗廟 事社

稷並詳 藉一

# 藉田三

原饗醴

國語王親饗醴賈逵注饗飲也王沐浴飲醴酒

省功

又后稷省功太史監之司徒省

民太師監之畢宰夫陳饗膳宰監之膳夫贊王王飲太牢班膏之庶人終食賈逵注太師三公官也

迎

春和

漢名臣奏黃瓊上言先農之禮所宜躬親以迎春和以致時雨

省風土

國語瞽師音官

以省風土廩於藉東南鍾而藏之

侯知敬

樂記武王克殷耕藉然後諸侯知所以敬

史

奉禮

見任豫藉田賦

枉千乘

曹植藉田賦枉千乘于隴畝執鋤鑿于畦町

祠一

牢

詳藉

戒農用

國語命農夫咸戒農用

具田器

藉田賦具田器布農事

太史順時

國語周宣王不藉千畝號文公諫曰稷為大官古者太史順時覲土陽瘳憤盈土氣

震發農祥晨正日月底于天廟土乃肱發稷以告王曰  
史帥陽官以命我司事曰距今九日土其俱動王其祇

祓監農不易賈逵注祇敬也祓除也  
不易土物之宜循其土俗不易也

農正陳禮

國語賈逵

注農正田大夫主數陳藉  
禮而祭其神為農祈也

司空除壇

又司空除壇于藉先時五日瞽

告有協風至王即齊宮百官御事各即其  
齊三日王乃淳濯及期灌鬯饗醴乃行

野廬埽路

見潘岳藉田賦

百官御事

國語賈逵注御治也

庶民畢從

國語

置耒

軾上

晉輿服志金根車天子親耕所乘也置耒耜于軾上

耕田宮中

漢昭紀詳藉一

發趾千畝

見繆襲許昌宮賦

帥先萬國

見繆賦

親祭之義

晉禮

志尚書符問藉田至尊應親祀先農否賀循荅曰漢儀  
無至尊應自祭之文然周禮王者祭四望則毳冕祭社

稷五祀則綿冕以此  
不為無親祭之義也

勸農之道

藉田之禮廢則王教之典缺矣勸農之道

缺矣

公卿祀先農

隋書禮志詳籍一

司農掌公田

曹植籍田賦營疇萬

畝厥田上上奇柳夾路名果被園司農實掌是謂公田

敦孝致敬

勤已勸人

后稷播殖

夏禹躬耕

修六府穀為之本

陳八

政食以為先

將率三推誠本農于后稷

不藉千畝

豈貽諫於號公

既種既稼將耒耜以率先

不躬不

親豈梁盛之致信

周宣情千畝之禮號公納諫

漢

文缺三推之義賈生置言

增祥正而青旗肅事

土

膏而朱紘戒典 杏花萑葉耕穫不愆 清畛冷風述

遵無廢 阡陌繡錯 原隰龍鱗 蒸膏冒楨 協風

回春 謹察天廟 申敕陽官 擁耒成林 醴流降

雨 陽春如膏 原隰如鱗 民一于邦 家萬斯箱

捐夔獮以護野 雜荆年以守燎 在豐念匱 在

飫思饑 稊出椒掖 器成大農 瞻榆束耒 望杏

開田 望朱紘之光 聽鸞輅之音 史奉載耜之禮

民奏舉趾之歌 千軫風行 萬轡霧轉 順動而

取諸豫 時行而應乎乾 我疆我理 必躬必親

祥風發於耒耜 瑞雪掩于郊廛 農祥晨晰 土膏

初起 春原俶載 青壇致祀 斂蹕長阡 回旌外

壝 景集天廟 肱壤祥農 青壇岳立 翠幙煙平

百司駁奔 三公肅事 紺轅黛耜 綠耦朱紘

藉千畝 勸九農 載御耦于介間 肱陽膏於廛左

借民之力時闢于甫田 為神之倉歲儲于馨稷

服黛耜以天臨 紆朱紘而身勸 本宜一墾 遂過

九推

以上俱見玉海

藉田四

原詩宋顏延之侍東耕詩曰堤封經地域辰角麗天節  
浮靄起青壇沈腴發紺耦草服薦同穗黃冠獻嘉壽

謝莊侍東耕詩曰肅鑣奉晨發恭帶厠朝聞仙鄉降朱  
靄神郊起青雲陰臺承寒綵陽樹迎初薰觀德欣臨藉  
瞻道樂遊汾 梁武帝藉田詩曰寅賓始出日律中方  
星鳥千畝土膏紫萬頃陂色縹嚴駕佇霞昕浥露逗光



曉啓行天猶暗伐鼓地未悄蒼龍發蟠蜿青旂引窈窕  
仁化洽孩蟲德令禁胎天耕藉乘月映遺滯指秋杪年  
豐庶讓多歲薄禮節少公卿秉耒耜庶甿荷鋤耰一人  
慙百王三推先億兆簡文帝藉田詩曰禮經聞往說  
觀寶著遐篇豈如春路動祈穀重民天蒼龍引玉軼交  
旗影曲旃皮軒承早日豹尾拂游煙地廣重畦淨林芳  
翠幙懸青壇出長畎帷宮繞直阡秉耒光帝則報獻重  
皇虔度諧金石奏德厚歌頌詮三春潤蓂莢七月待鳴

蟬鯨魚顯嘉瑞銅雀應豐年不勞鄭國雨無榮鄴令田

是知躬稼美兼聞富教宣 陳張正見從藉田應衡陽

王教作詩曰帝京惟赤縣神居應紫微塗山萬國仰滄

海百川歸東郊事平秩仲月祀靈威含光開早扇閭闔

啓朝扉 洛城鐘漏息靈臺雲霧卷森森虎戟前藹藹

鑾旂轉屬車遊絳闕風鳥度丹巘帳殿幸金輿旌門擁

玉輦 玉輦帶飛煙金輿映綠川雨師清遠路風伯靜

遙天分渠通沃野激水入公田草發青壇外花飛蒼玉

前蒼玉臨珪璧青壇躬帝藉冒櫛乃三推齊衡均百  
辟蘭場儼芝駕桂圃芳瑤席山禽韻管絃野獸和鐘石  
鐘石既相和江海復無波梁客簪裾盛陳王文雅多  
脩塗參弱駘喬木間輕蘿幸承濫吹末擊壤自為歌

原賦魏繆襲許昌宮賦曰大和六年春上既躬耕帝藉  
發趾于千畝以帥先萬國乃命羣牧守相述職班教順  
陽宣化是歲甘露降方內豐穰穆乎有太平之風敕義  
仲以農期儀晨祥而舉趾晉潘岳藉田賦曰伊晉之

四年正月皇帝親率羣后藉于千畝之甸禮也於是乃  
使甸師清畿野廬埽路封人墳宮掌舍設柩青壇蒔其  
嶽立翠幕黜以雲布結崇基之靈趾啓四塗之廣阼沃  
野墳腴膏壤平砥清洛濁渠引流激水遐阡繩直通陌  
如矢總轡服於縹輶紂轅綴於黛耜儼儲駕於廛左俟  
萬乘之躬履百僚先置位以職分自上下下具惟命臣  
襲春服之萋萋接遊車之駢駢微風生於輕幘纖埃起  
乎朱輪森奉璋以階列望皇軒而肅震若湛露之晞朝

陽似衆星之拱北辰於是前驅魚麗屬車鱗萃闔闔洞  
啓參途方駟常伯陪乘太僕秉轡后妃獻種稔之種司  
農撰播植之器挈壺掌升降之節宮正設門閭之蹕天  
子乃御玉輦蔭華蓋衝牙鉾鎗綃紈綵繅表朱玄於離  
坎飛青縞於震兌中黃煜以發暉方綵紛其繁會震震  
填填以幸乎藉田蟬冕頽以灼灼碧色肅其芊芊似夜  
光之剖荆璞若松柏之依山巔於是我皇乃降靈壇撫  
御耦坻場染屨洪縻在手三推而舍庶人終畝貴賤以

班或五或九躡踵側肩拑裳連袂黃塵為之四合陽光  
為之潛翳動容發音而觀者莫不忭舞乎康衢謳吟乎  
聖世有邑老田父進而稱曰益損益隨時理有常然高  
以下為基民以食為天九土之宜弗任四民之務不一  
展三時之弘務致倉廩於盈溢固堯湯之用心而存救  
之要術若乃廟祧有事祝宗諏日黍稷馨香旨酒嘉粟  
古人有言曰昔者明王以孝治天下其或繼之者希矣  
逮我皇晉實光斯道儀型乎於萬國愛敬盡于祖考敢

作頌曰思樂甸畿薄采其茅大君戾止言藉其農其農  
三推萬方以祇耨我公田實及我私我簋斯盛我簠斯  
齊我倉如陵我庾如坻念茲在茲永言孝思人力普存  
祝史正辭神祇攸歆逸豫無期一人有慶兆民賴之

宋任豫籍田賦曰瞻望圭景咫尺山川緬彼帝籍百有  
餘年映至德于盛位儼列晷于微辰紆汾陽以昧旦信  
堯心而禹勤史奉載耜之禮民奏舉趾之歌膏壤千畝  
與式既同區勢平易畎陌修通提攜丘澤眺嶺面松

陳江總勞酒賦曰在陽春之仲序覽具物之芳菲帥公卿而播百穀親耒耜而命三推開青壇于迥甸列翠幙於清沂乃遵執爵之典爰降食苹之讌豁朱鳥之高牕啓黃龍之抗殿奏帝鴻之萬舞動鈞天之九變顧曲私之亭育遇寒暑而徂遷謬陳力而策駘豈酬恩於暮年原頌唐岑文本藉田頌曰正位恭己體元得一望之如雲就之如日郊廟致敬山川咸秩教先大道學敦儒術憲章載記殷鑒周宣廻輿南畝駐蹕東廛親耕帝籍躬



稼大田方期多稼介此豐年富實教資農惟政本上敦  
播植下勤蓀蓂榮辱既著淳樸可反禮節既興登封何  
遠式敷帝典載穆王度元良育德維城作固股肱周召  
爪牙信布比漢之北方周之祚

原文齊謝朓為隨王粲東耕文曰穀躔星景穡表蜡先  
八政奚首六府茲宣弊嗟非國登頌有年一夫或怠望  
歲誰天 梁元帝祭東耕文曰三農九穀為政所先萬  
箱億廩是曰民天繫稱斲耜耜書美厥田花開杏樹凍解

新泉當使黍稷莫莫民翳胥樂甘雨祁祁遂及我私我  
私之熟表裏禔福禔福中田歲取十千是薦是藁登頌  
有年

原啓梁元帝慶東耕啓曰伏惟陛下敬授民時造輶藉  
圃漢之元鳳未足捧羈晉之太始非堪扶輶但承明侍  
從即事末由周南留滯伏深戀仰

原論魏曹植藉田論曰春耕于藉田郎中令侍寡人焉  
顧而謂之曰昔者神農氏始嘗萬草教民種植今寡人

之興此田將欲以擬乎治國非徒娛耳目而已也夫營  
疇萬畝厥田上下經以大陌帶以橫阡此亦寡人之封  
疆也日殄沒而歸館晨未昕而即野此亦寡人之先下  
也菽藿特疇禾黍異田此亦寡人之政理也及其息沸  
涌庇重陰懷有虞撫素琴此亦寡人之所習樂也蘭蕙  
荃蘅植之近疇此亦寡人之所親賢也藜蓬臭蔚棄之  
遠疆此亦寡人之所遠佞也若年豐歲登果茂菜滋則  
臣僕小人咸取驗焉 又曰封人有能以輕鑿脩鉤去

樹之蝸者樹得以繁茂中舍人曰不識治天下者亦有  
蝸乎寡人告之曰昔三苗共工鯀驩兜非堯之蝸與問  
曰諸侯之國亦有蝸乎寡人告之曰齊之諸田晉之六  
卿魯之三桓非諸侯之蝸與然三國無輕鑿脩鉤之任  
終于齊篡魯弱晉國以分不亦痛乎曰不識為君子者  
亦有蝸乎寡人告之曰固有之也富而慢貴而驕殘仁  
賊義甘財悅色亦君子之蝸乎天子勤耘以收一國大  
夫勤耘以收世祿君子勤耘以顯令德夫農者始於種

終於獲澤既時矣苗既美矣棄而不耘則故為荒疇益  
豐年者期於必收譬脩道亦期於沒身也

增疏漢黃瓊行藉田禮疏曰自古聖帝哲王莫不敬恭  
明祀增致福祥故必躬郊廟之禮親藉田之勤以先羣  
萌率勤農功昔周宣不藉千畝號文公以為大譏卒有  
姜戎之難終損中興之名竊見陛下遵稽古之鴻業體  
虔肅以應天順時奉元懷柔百神朝夕觸塵埃於道路  
晝暮聆庶政以恤人雖詩詠成湯之不忘遑書美文王

之不暇食誠不能加今廟祀適闕而祈穀潔齋之事近在明日臣恐左右之心不欲屢動聖躬以為親耕之禮可得而廢臣聞先王制典藉田有日司徒咸戒司空除壇先時五日有協風之應王即齋宮饗醴載耒誠重之也自癸巳以來仍西北風甘澤不集寒涼尚結迎春東郊既不躬親先農之禮所宜自勉以逆和氣以致時風易曰君子自强不息斯其道也

親蠶一

增書禹貢兗州厥貢漆絲 詩蠶月條桑 原周禮內

宰中春詔后帥外內命婦始蠶于北郊以為祭服歲終

稽其功事

注蠶于北郊婦人以純陰為尊郊必有公桑蠶室馬疏按月令三月后妃親東鄉躬桑此

云二月佐后而受獻功者比其小大與其粗良而賞罰之

增大宰九職嬪婦化治絲枲 典絲掌絲入而辯其

物 內司服掌王后之六服褕衣揄狄闕狄鞠衣展衣

緣衣素沙

注鞠衣黃桑服也色如鞠塵象桑葉始生

月令季春之月天子乃

薦鞠衣於先帝

注為將桑求福祥之祚也先帝太皞之屬

巾車翟車貝面

組紵有握

注后所乘以出桑

記月令季春鳴鳩拂其羽戴勝

降于桑

注蠶將生之候

具曲植簾筐后妃齋戒親東鄉躬桑禁

婦女毋觀省婦使以勸蠶事蠶事既登分繭稱絲效功

以供郊廟之服毋有敢惰

注后妃親採桑示帥先天下也夏小正曰妾子始蠶執養

官事原孟夏之月蠶事畢后妃獻繭乃收繭稅以桑為

均貴賤長幼如一以給郊廟之服

注內命婦獻繭于后妃收繭稅者收于外

婦增季夏之月命婦官染采黼黻文章必以法原

祭統皇后蠶于北郊以共純服夫人蠶于北郊以供冕



服王后夫人非莫蠶也身致其誠信也 增玉藻惟世

婦命于奠繭注世婦以下蠶事畢獻繭乃命之䟽謂世

婦及命婦入助蠶畢獻繭也 原祭義古者天子諸侯

必有公桑蠶室近川而為之築宮仞有三尺棘牆而外

閉之及大昕之朝季春朝日之朝君皮弁素幘卜三宮夫人世

婦之吉者使入蠶於蠶室奉種浴于川桑于公桑風戾

以食之風戾之使露氣燥乃以食蠶歲既單矣三月月盡之後世婦卒蠶奉

繭以示君遂獻繭于夫人夫人曰此所以為君服與遂

副禕而受之因少牢以禮之古之獻黼者其率用此歟  
及良日夫人繅三盆手遂布于三宫夫人世婦之吉者  
使繅遂朱綠之玄黃之以為黼黻文章君服以祀先王  
先公敬之至也 增魯語王后親織玄統公侯夫人加

以紃紆社而賦事烝而獻功 公羊注后夫人親西郊

采桑以供祭服 穆天子傳甲寅天子作居范宮以觀

桑者乃飲于桑中命桑虞出桑者禁暴民 原列女傳

曰宿瘤齊東郭采桑之女也閔王娶為后 增禮馬質

注天文辰為馬引蠶為龍精月值大火則浴其種是蠶  
與馬同氣故此亦中春始蠶亦謂浴種 夏官禁原蠶

者注再蠶也蠶與桑同生三月故春蠶宜養夏蠶有禁  
劉安曰原蠶一歲再養非不利也王者禁之為其殘桑  
也 原五禮先蠶儀注曰親蠶前二日太祝令質明以  
太牢祀先蠶 皇后親蠶儀注曰皇后躬桑始將一條  
執筐受桑 周遷古今輿服雜事曰蠶始生后食之三  
瀝而止 增蠶經曰黃帝元妃西陵氏始蠶蓋黃帝制

作衣裳因此始也 後漢書禮儀志漢永平二年三月

皇后帥公卿諸侯夫人蠶祠先蠶禮以少牢注丁孚漢  
儀曰皇后出乘鸞輅青羽蓋駕駟馬龍旂九旒大將軍  
妻參乘太僕妻御前鸞旗車皮軒闌戟雒陽令奉引亦  
千乘萬騎車府令設鹵簿公卿五營校尉司隸校尉河  
南尹妻皆乘其官車帶夫本官綬從其官屬導從皇后  
置虎賁羽林騎戎頭黃門鼓吹五帝車女騎夾轂執法  
御史在前後亦有金鉦黃鉞五將導系于蠶官手三盆

于繭館畢還宮月令曰禁婦女無觀按谷永對四月壬子皇后蠶桑之日也則漢桑亦用四月漢舊儀曰春桑生皇后親桑于苑中蠶室養蠶千薄以上祠以中牢羊豕羣臣妾役桑還獻于繭觀皆賜從桑者樂皇后自行凡蠶絲絮織室以作祭服祭服者冕服也天地宗廟群臣五時之服其皇帝得以作縷縫衣得以作巾絮而已置蠶官令丞諸天下官皆詣蠶室亦婦人從事故舊有東西織室作法 漢制皇后蠶服青上縹下貴人助蠶

服純縹皇后以蠶衣為朝服 宋志漢東郊非古也魏

北郊依周禮也晉西郊與藉田對其方也 原董巴輿

服志曰漢皇后桑于東郊苑中 又曰太皇太后入廟

服紺上皂下蠶青上縹下簪以玳瑁長一尺端為華勝

上為鳳凰 漢書曰孝元王皇后為太后幸蘭館率皇

后及列侯夫人桑道霸水而被除 後漢書皇后紀明

德馬皇后置織室蠶于濯龍中數往觀視 增隋書禮

志吳帝昭製西蠶頌則孫氏亦有其禮 晉書武帝紀

太康九年皇后親蠶于西郊賜帛各有差 原晉書禮  
志漢儀皇后親桑東郊苑中蠶室祭蠶神曰苑窳婦人  
寓氏公主祠用少牢詔侍中成粲草定其儀取列侯妻  
六人為蠶母蠶將生擇吉日后著十二筭步搖衣青衣  
乘油畫雲母安車駕六驄馬女尚書陪乘載筐鉤外命  
婦皆步搖衣青各載筐鉤先桑二日蠶室生蠶著薄上  
桑日太祝令以一太牢告祠皇后至西郊東面躬桑採  
三條諸妃公主五條縣鄉君以下九條以桑授蠶母

皇后採桑壇在蠶宮西南 增南史宋大明三年立蠶

宮于西郊四年倣晉氏立蠶觀 又大明四年皇后率

六宮躬桑于西郊皇太后觀禮詔曰卜祥大昕測辰拂

羽爰詔六宮親蠶川室皇太后降鑾後御佇蹕觀禮綠

遽既具玄統方脩儀發椒闥化動中縣 北齊為蠶坊

蠶宮 隋書禮志周禮王后蠶于北郊漢法于東郊魏

遵周禮于北郊晉太康六年于西郊依漢故事宋大明

四年始于臺城西白石里為西蠶設北域置大殿七間



又立蠶觀

後周制后乘翠輅至蠶所奠先蠶西陵氏

神

自齊及隋多依晉儀損益

唐志皇后季春吉已享先蠶遂以親

桑散齋三日于後殿致齋一日于正寢一日于正殿致齋之日尚服率司仗布侍衛司賓引內命婦陪位六尚以下各服其服詣後殿奉迎皇后服鈿釵禮衣結佩乘輿出自西房華蓋警蹕降就齋室散齋散齋之日內侍率內命婦之吉者使蠶于蠶室前享二日大樂令設宮縣之樂於壇南內壝之內女工各位於縣後右校為採

桑壇於壇南二十步所方三丈高五尺四出陞尚舍量  
施帷障于外壇之外設御位于壇之東南西向又設御  
採桑位于壇上東向享日司設升設先蠶氏神座于壇  
上其日六尚以下詣室奉迎尚服負寶內僕進厭翟車  
皇后服鞠衣乘輿以出華蓋侍衛警蹕皇后升車尚功  
奉鉤司製進筐載之內命婦及六尚等乘車從駕至大  
次門外請降車皇后停大次半刻頃出次入自東門至  
版位樂三成受幣跪奠於神座已奠乃奉毛血跪奠于

神座前皇后復位復升自壇酌醴齊進先蠶氏神座前  
奠爵尚儀讀祝文皇后再拜飲福受胙復位尚功曰禮  
畢引詣採桑壇尚功奉金鉤採桑三條止內外命婦以  
次采一品採五條二品採九條止司賓引至蠶室尚功  
以桑授蠶母蠶母切之以授媵好食蠶洒一薄止車駕  
還宮之明日內外命婦設會于正殿如元會之儀命曰  
勞酒 肅宗張后傳親蠶苑中羣命婦相禮儀物甚盛  
百官志掖庭局公桑養蠶會其課業 會要永徽三

年制以先蠶為中祠后不祭則皇帝遣有司享之如先農祭先蠶樂章二奏永和之舞顯慶三年洗馬郭瑜撰先天二年皇后親祠先蠶自嗣聖以來禮廢至是重行開元十五年上命宮中育蠶丁酉夏至賜貴近絲人一統明皇以六宮親蠶絲賜近臣崔沔獻御絲賦通典北齊先蠶壇高五尺方二丈四陛陞各五尺皇后蠶壇高四尺方二丈四出陛廣八尺隋置壇于宮北三里高四尺唐在長安宮北苑中高四尺周回三十

步至道元年馮翊民李元真獻養蠶經一卷上觀之  
以不忘本業留書禁中賜錢萬 崇文日南王蠶經三  
卷孫氏蠶書二卷 景德三年王欽若言竊以九年之  
儲以穀帛為本萬民之業以農桑為先故千畝之祀王  
者所以勸耕民吉已之祠王后所以率蠶婦稽往古之  
制皆合親行從後世之宜亦當攝祭伏見開寶通禮郊  
祀錄並有親蠶祝祠蓋由中宮未嘗親祭是以禮司缺  
而不舉義纂云后親享貴妃亞獻昭儀終獻攝事則尚

宮初獻尚儀亞獻尚食終獻臣謂屬之命婦不若歸於  
有司按周禮大宗伯后不祭則攝而薦徹王后之事而  
宗伯得攝之農桑衣食萬人不宜獨缺先蠶之祭皇帝  
遣有司享之如先農可也詔禮官詳考攝祭故事以聞  
乃請於東郊擇地設壇取漢制以春桑生之義壇高五  
尺方二丈四出陛陞廣五尺一壝祀禮如中祠遣太常  
光祿卿奉祀祝辭以先農為準奏可元豐四年詳定禮  
文所言唐月令注以先蠶為天駟按先蠶之義與先農

先牧先炊一也開元禮享先蠶為瘞塹於壇之壬地禮儀羅曰無燔柴之儀王涇郊祀錄載祝文曰惟神肇興蠶織則是始蠶之人明矣今壇在東郊熙寧祀儀又有燎壇則沿襲唐月令以為天駟誤矣周禮后蠶於北郊以純陰為尊請為壇北郊以享始蠶之人不設燎壇瘞埋以祭從之大觀四年議禮局言開元禮享先蠶幣以黑請從黑以合至陰之義政和元年於壇側度地築公桑蠶室其親蠶殿名曰無斁宣和元年皇后親蠶於延

福宮於宮築採桑壇繭館織室服用鞠衣 紹興二年  
上謂輔臣曰宮中亦自有蠶欲知女工艱難俾每事質  
儉五年上曰朕令宮中養蠶庶知稼穡艱難七年常博  
黃積厚請季春吉己日享先蠶從之十五年太常丞王  
湛請於禁中行親蠶之禮不果行 宋時於延春閣兩  
壁畫農家蠶織甚詳

親蠶二

原織室 桑壇 蠶宮 繭館 北郊 東苑 縹服



華簪 分繭 均桑 一條 三洒以上並詳蠶一 增服

青縹 載筐鉤詳蠶一 禮志詳蠶一 晉 幸蠶館 置織室見漢書詳

蠶一 東觀 親蠶北郊 采桑東郭周禮詳蠶一 列女傳詳蠶一 漢記詳蠶一

原三宮夫人時展北郊之禮 十畝桑者盡趨南陌

之功 采帝女之桑爰求十畝 分后妃之繭遂布三

宮 增女執懿筐 婦成祭服 占之五泰 準以三

齊 繅三盆 修六服 海人冰蠶 園客絲緒 神

蠶之木 帝女之林 鳴鳩醉樾之朝 戴鵲降桑之

日 駕帷就列 驚服斯臨 翠蓋參差 翟扇容裔

俱見  
玉海

親蠶三

增賦漢傅毅洛都賦曰桑宮繭館區別有矩后率九嬪  
躬敕工女 原晉閔鴻親蠶賦曰后課功以觀匿均衆  
寡而抽稅令織紵於命婦供禘郊之舊制洪恩美而周  
普配春天之景福揚黼黻之奇藻播朱紫之艷色

原頌魏帝誕皇后親蠶頌曰于時明庶扇物鳥帑昏正

躬耕帝藉邁德班令嘉柔桑之肇敷思郊廟之至敬命  
皇后以親蠶俾躬桑於外垆考時日于巫咸詔太卜以  
獻禎御坤德之大輅翳翠葆以揚旌爾乃皇英參乘塗  
山奉輿總姜任于後陳載樊衛于貳車千乘隱其雷動  
萬騎粲以星敷啓前路于三官命蚩尤而清衢遊青蚪  
于左角步素螭于右隅登崇壇而正位覲休氣於朝陽  
步雕輦而下降手柔條于公桑嬪妾肅以莅事職蠶植  
而承筐供副禘之六服昭孝敬于蒸嘗盛華禮于中宁

神化馳於八方乃延羣妾宴賜于前降至貴以逮下布  
愷悌之渥恩禮儀備序巾車回轅班中黃之禁財散束  
帛之芟芟神澤沛以雨施洪恩布於臚原同碩慶於生  
民發三靈之永歡苞繁祐於萬國卷福釐以言旋美休  
祚於億載豈百世之曾元

增文晉左芬文曰亦既青陽鳴鳩告時躬執桑曲率導  
媵姬脩成蠶簇分繭理絲女工是察祭服是治祇奉宗  
廟永言孝思



御定淵鑑類函卷一百五十七

欽定四庫全書薈要卷一萬一千六百六

子部

御定淵鑑類函卷一百五十八

禮儀部五

巡狩

巡狩一

原風俗通曰巡者循也狩者牧也道德太平王者為天  
循行以牧人也恐遠近不同化幽隱有不得所者故自  
躬親行之 禮記曰王者必制巡狩之禮何尊天重民  
也所以五年一巡狩何五歲再閏天道大備王者恩亦

當竟也所以至四嶽者盛德之山四方之中能興雲致雨 易觀卦曰風行地上觀先王以省方觀民設教

三齊略記曰堯山在廣固城西七里堯巡狩所登遂以  
為名山頂立祠祠邊有柏樹枯而復生不知幾代樹也  
黃帝太一密推曰欲先知巡狩之年當視太一與天  
目在四維之歲法為巡狩 書舜典歲二月東巡狩至  
於岱宗柴望秩于山川肆覲東后協時月正日同律度  
量衡修五禮五玉三帛二生一死贄如五器卒乃復五



月南巡狩至于南嶽如岱禮八月西巡狩至于西嶽如  
初十有一月朔巡狩至于北嶽如西禮歸格于藝祖用  
特 白虎通曰巡狩所以四時出何當承宗廟故不踰  
也以夏之中月同律度得其中也 增禮周制十二年  
一巡狩天子將巡狩類乎上帝宜乎社造乎禰職方氏  
先戒四方諸侯曰各修平乃守考乃職事無敢不敬戒  
國有大刑及王之所行先道率其屬而巡戒令太馭掌  
犯較之禮土訓氏夾王車而行以待王問九州形勢山

川所宜誦訓氏亦夾王車以上古久遠之事以告王又掌道方慝以詔辟忌以知地俗乘金輅建大旂歲二月東巡狩至于岱宗柴而望祀山川覲諸侯其方之諸侯先於境首待之所過山川則使祝宗先以三等璋瓚皆以黃金為鼻流酌鬱鬯以禮神次乃校人殺黃駒以祭之每宿舍掌舍設桎桓再重其外則土方氏又設蕃籬既至方岳先問百年就見之若未滿百年八十九十者路經其門則見之不然則否天子乃令太師採人歌謠

賦詩以樂播而陳之以觀人風俗以審其善惡命典市  
納賈陳百物之貴賤以觀人之所好惡又命典禮之官  
考校四時節炁月之晦朔甲乙等日及候氣之律呂所  
用禮樂宮室車旗等制度君臣上下之衣服皆以王者  
所頒制度考校之諸侯封內有名山大川不舉而祭之  
者為不敬不敬者君削其地有祭宗廟不順昭穆者為  
不孝不孝者君絀以爵變禮易樂者為不從不從者君  
流革制度衣服者為畔畔者君討有功德于人者加地

進律其諸侯待王之牢禮以一犢既黜陟諸侯乃與之  
相見於方岳之下築壇與覲禮壇其壇外為土埽方三  
百步開四門壇方九十六尺高四尺上為堂下為三等  
謂之三成成每等高一尺其堂置司盟之神位謂之方  
明 又外傳曰普天之下莫非王土封建諸侯各守天  
子之地故巡行之夏殷五載一巡狩周制十二年一巡  
狩皆在仲月以至嶽下燔柴告天巡狩之年四方諸侯  
先會嶽之下以候見 原左傳曰天子非展義不巡狩

注巡狩所以宣布德義也 增左傳僖公二十八年晉

侯召王以諸侯見且使王狩仲尼曰以臣召君不可以  
訓故書曰天子狩于河陽言非其地且明德也 原帝

王世紀曰舜東巡狩登南山觀河渚受圖書褒賜羣臣

增孔叢子曰古者天子將巡狩必告于祖禰命告羣

祀及社稷畿內名山大川七日而遍視牲及用幣 原

越絕書曰禹巡狩大越見耆老納詩書審銓衡平斗斛

蔡邕獨斷曰巡狩校獵還公卿以下陳雉陽都亭前

街上乘輿到公卿下拜天子下車公卿親識顏色然後  
還宮古語曰在車則下惟此時施行 增穆王得驥溫  
驪騮耳之駟西巡狩樂而忘歸徐偃王作亂造父為穆  
王御長駟歸周 史記秦始皇紀二十七年巡隴西北  
地出雞頭山過回中焉作信宮渭南治馳道 二十八  
年始皇東行郡縣上鄒嶧山立石與魯諸儒生議刻石  
頌秦功德議封禪望祭山川之事乃遂上泰山立石封  
祠祀下風雨暴至休于樹下因封其樹為五大夫禪梁

父刻所立石乃並渤海以東過黃腫窮成山登之罘立石頌秦德焉而去南登琅邪大樂之留三月乃徙黔首三萬戶琅邪臺下復十二歲作琅邪臺立石頌德遣徐市發童男女入海求仙人還過彭城齋戒禱祠欲出周鼎泗水使千人没水求之不得乃西南渡淮水之衡山南郡浮江至湘山祠自南郡由武關歸原漢書武帝本紀元封元年行自雲陽北歷上郡西河五原出長城登單于臺至朔方臨北河勒兵十八萬騎旌旗千餘里

威震匈奴還登封泰山 增至於梁父檀肅然行所巡

至博奉高蛇丘歷城梁父民田租逋賦貸已除加年七十以上孤寡帛人二疋四縣無出今年算行自泰山復巡海上至碣石自遼西歷北邊九原歸于甘泉周萬八千里云 原又元封五年南巡狩至于盛唐望祀虞舜于九疑自尋陽浮江親射蛟江中獲之舳艫千里薄樅陽而出作盛唐樅陽之歌 增後元元年詔曰朕郊見上帝巡于北邊見羣鶴留止以不羅網靡所獲獻薦于



太時光景並見其赦天下 通考後漢世祖建武十七

年南巡狩 十八年西巡狩祠高廟遂有事十一陵立

馮翊界進幸蒲坂祠后土 十九年九月南巡狩幸南

陽進幸汝南南頓縣舍置酒會賜吏人復南頓田租一

歲父老前叩頭言曰皇考居此日久陛下識知寺舍每

來輒加厚恩願賜復十年帝曰天下重器常恐不任日

復一日安敢遠期十歲乎吏人又言陛下實惜之何言

謙也帝大笑復增一歲 二十年東巡狩 明帝永平

二年西巡狩幸長安祠高廟遂有事于十一陵歷覽館  
邑會郡縣吏勞賜作樂 十年南巡狩幸南陽祠章陵  
日北至又祠舊宅禮畢召校官弟子作雅樂奏鹿鳴帝  
自御塤簎和之以娛嘉賓還幸南頓勞享三老官屬  
十五年東巡狩幸孔子宅祠仲尼及七十二弟子親御  
講堂命皇太子諸王說經 章帝建初七年西巡狩每  
所到幸輒會郡縣吏人勞賜作樂十一月詔勞賜河東  
守令掾以下 元和元年南巡狩詔所經道上郡縣無

得設儲侍命司空自將徒支柱橋梁有遣使奉迎探知起居二千石當坐其賜鰥寡孤獨不能自存者粟人五斛十一月還宮賜從者各有差 原二年二月東巡狩使使者祠唐堯於成陽靈臺

注成陽縣東南有堯母祠墓

辛未幸泰

山柴告岱宗有黃鵠三十從西南來翱翔升降進幸奉

高宗祀五帝於汶上明堂 增三年正月北巡狩告常

山魏郡清河鉅鹿平原東平郡太守相曰朕惟巡狩之制以宣聲教考同遐邇解釋結寃也今四國無政不用

其良駕言出遊欲親知其劇易前祀園陵遂望祀華霍  
東柴岱宗為人祈福今將禮常山遂徂北土歷魏郡經  
平原升踐隄防詢訪耆老咸曰往者汴門未作深者成  
淵淺則泥塗追維先帝勤人之德底績遠圖復禹弘業  
聖迹滂流至于海表不克堂構朕甚慚焉月令孟春善  
相丘陵土地所宜今肥田尚多未有墾闢其悉以賦貧  
民給與糧種務盡地力勿令游手所過縣邑聽半入今  
年田租以勸農民之勞乙丑敕侍御史司空曰方春所

過毋得有所伐殺車可以引避引避之駢馬可輟解輟  
解之詩云敦彼行葦牛羊勿踐履禮人君伐一草木不  
時謂之不孝俗知順人莫知順天其明稱朕意 和帝  
永和十五年南巡狩賜所過二千石長吏以下三老官  
屬及民百年者錢布各有差幸章陵祠舊宅 魏明帝  
凡三東巡狩所過存問高年恤疾苦或賜穀帛 宋書  
禮志曰古者天子巡狩之禮布在方冊至秦漢巡幸或  
以厭望氣之祥或以希神仙之應煩擾之役多非舊典

惟漢諸帝頗有古體焉魏文帝值三分初創方隅事多  
皇輿亟動略無寧歲蓋應時之務又非舊章也明帝東  
巡所過存問高年恤人疾苦或賜穀布有古巡幸之風  
焉 宋文帝元嘉四年東巡狩至于丹徒告觀園陵享  
會父老舊勲于行宮加賜衣裳幣帛蠲租原刑戰亡之  
家單孤並隨宜隱卹二十六年東巡幸至京城并謁二  
陵會舊京故老萬人勞享賚發赦蠲徭役 後魏文成  
帝和平元年東巡狩歷嶠山祀黃帝遼西遙祀醫無閭

山遂緣海幸冀州北至中山過恒嶽禮其神而反明年  
南巡過石門遣使者用玉璧牲牢禮恒嶽原摯虞新  
禮儀曰魏氏無巡狩故事新禮則巡狩方岳柴望告至  
設壇諸侯之覲者乃贅皆如儀而不建旗臣虞謹按覲  
禮天子各建其旗旗章所以殊爵命視等威也詩稱君  
子至止言觀其旗宜定新禮建旗如舊增隋煬帝大  
業元年詔曰聽採輿頌謀及庶民故能審刑政之得失  
今將巡歷淮海觀省風俗唐太宗貞觀元年三月幸

九成宮冬幸洛陽 十二年幸河北觀底柱因令勒銘

于上以陳盛德 開元禮皇帝巡狩儀將巡狩所司承

制先頒告于東方諸州曰皇帝二月東巡狩各修平乃

守考乃職事無敢不敬戒國有大刑駕將發告圓丘宗

廟社稷皆如別儀皇帝出宮大備鹵簿皆如常儀輶於

國門祭所過山川如親征之禮所經州縣刺史縣令先

待于境通事舍人承制問百年古先帝王名臣烈士皆

州縣致祭燔柴告至將告將作先於太山下脩園壇四



出陞前告三日尚舍直長施大次於外壝東門之內設  
宮懸樂燎壇之制前一日皇帝清齋于行宮應告之官  
皆于告所清齋一日近侍之官應後升者及從告羣官  
諸方客使皆于其所俱清齋一宿諸衛令其屬晡後一  
刻各以其方器服守衛壝門盥太樂工人俱清齋一宿  
奉禮設御位于壇之東南西向設告官司徒執事者御  
史奉禮贊者協律郎太樂令望燎位東方諸州刺史縣  
令介公鄼公文武九品以上官西方北方蕃客等位並

如上幸圓丘儀設告官以下門外位於東西墀門之外  
道南皆如設次之式郊社令帥府史一人及齋郎以罇  
坩壘洗篚冪入設于位並如上儀執罇壘篚冪者各位  
于罇壘篚冪之後告日未明十五刻太官令帥宰人烹  
牲于厨未明四刻太史令郊社令各服其服升設昊天  
上帝神座于壇上北方南向席以橐秸設高祖神堯皇  
帝神座于東方西向席以莞設神位各于座首未明三  
刻諸告官以下各服其服郊社令良醞令各帥其屬入

實樽壘及玉太祝以玉帛置于篚太宮令帥進饌者實  
諸籩豆簠簋等皆設于饌幔內未明三刻奉禮帥贊者  
先入就位贊引引御史太祝以下入行埽除如常儀訖  
各就位皇帝服袞冕乘輅行宮奏請進發內外器服如  
常儀駕將至謁者贊引各引告官通事舍人引從告羣  
官東方刺史縣令諸方客使俱就門外位駕至大次門  
外回輅南向初皇帝既升奠玉幣太官令帥進饌者諸  
太祝迎引於壇上各設于神座前設訖謁者引司徒以

下降自東陞復位諸太祝各還罇所太常卿引皇帝詣  
壘洗樂止訖興皇帝再拜初讀祝文訖樂作太祝進奠  
板於神座還罇所皇帝拜訖樂止太常卿引皇帝進天  
帝座前北向立樂作太祝各以爵酌福酒謁者引司徒  
降復位太祝各進徹豆還罇所奉禮曰賜胙鑾駕還行  
宮皇帝既還大次侍中版奏請解嚴皇帝改服通天冠  
絳紗袍乘輅奏請還宮如常儀 宋太祖皇帝建隆初  
平潞陽二叛開寶二年至太原皆以師行供頓從儉約

故不備巡幸之儀 景德四年幸西京朝諸侯命知雜  
御史王濟等籍所過父老及繫囚逋負官物人仍察民  
間疾苦每日引逋欠人及禁囚等對于行在多蠲免原  
釋父老賜茶帛綾袍其貢香藥名馬召對撫慰賜之金  
帛大中祥符元年詔許羣臣請封禪令太山路葺行宮  
不得侵民戶田苗及人馬損踐苗稼有司言準禮巡狩  
有燔柴告至皇帝親行事即不載有司攝事之文車駕  
至太山合行告至望令太尉以酒脯幣帛于山下壇告

至奏可又詔給事中張秉等管勾所經州縣父老詣行  
在者送門引對賜以酒食州縣見禁囚具所犯以聞又  
詔以御史中丞王嗣宗攝御史大夫為考制度使左正  
言知制誥周起攝中丞為副使所經州縣採訪民間不  
便事并市物之價車服權衡度量不如法則者舉儀制  
禁之有奇才異行隱淪不仕者與所屬長吏詢求論薦  
鰥寡惻獨不能自存者重加賑恤官吏政迹尤異民受  
其惠及不守廉隅昧于政理者孝子順孫義夫節婦為

鄉里所稱者並條析以聞官吏知民間利病者亦為錄  
奏有司言澶州城門卑下不容大輦請徹門而出上慮  
煩勞不許詔由城外而過他所昏然又詔扈從人宿頓  
所無得壞民舍什物樹木違者重寘其罪為朝覲壇于  
奉高宮之南方九丈六尺高九尺四出陞其南兩陞設  
衛仗宮懸于壇中書門下文武百官皇親諸軍將校四  
方朝貢使舉人蕃客父老僧道皆在列設襲文宣公位  
于文官三品之下鄴州長吏悉集上服袞御壽昌幄殿

受朝賀大赦天下遂幸兗州賜從官待制以上宗室將軍辟寒九紫花茸綿細窄袍三畢設祀汾陰悉如東封之制八月有司言祠宇之旁難行覲禮望俟至河中府朝覲經度制置使陳堯叟等言寶鼎行宮之前可以設壇詔如堯叟等言 明永樂六年定制一詔告天下諸司及各處鎮守總兵官知會一禮部預行各處凡有重事并四夷來朝俱達行在所仍具本啓聞其餘事務啟奏俱達京師啓聞施行事有疑礙者在京合該衙門具



奏取自上裁凡進拜表箋表文達行在所箋文達京師  
一禮部預行經過所在軍民衙門俟車駕至官吏生員  
耆老朝見及預行北京畿內文武衙門令掌印官俟車  
駕至朝見一祭祀車駕將發奏告天地社稷太廟孝陵  
祭大江旗纛等神輟祭于天門其經過處所滁州遣官  
祭滁陽王泗州遣官祭祖陵鳳陽祭皇陵祭淮關里遣  
官祭先師孔子望祭太山緣途古先聖賢忠臣烈士祠  
墳禮部預期奏聞遣官致祭將至北京境上設壇祭北

京山川等神車駕至北京奏告天地祭告境內山川等神一扈從在京馬步軍五萬人一車駕至北京宴文武羣臣耆老賜官員人等及命婦鈔其嘗守城命婦論次行賞一恭遇萬壽聖節公侯駙馬伯文武四品以上近侍官及監察御史預宴五品以下辦事官監生秀才吏典軍民工匠人等依例賜鈔一錠一扈從官員有牙牌者隨身懸帶以憑關防出入一經過郡縣分遣廷臣考察守令賢否即加黜陟分令給事中監察御史存問高

年賜幣帛酒肉一經過鳳陽陵戶及親戚人賜鈔六錠  
耆老迎見者人鈔三錠泗州陵戶親戚耆老迎見者賞  
如之

### 巡狩二

原省方

述職

俱詳  
巡一

觀風

展義

詳巡  
一

布德

設

教

詳巡  
一

考職

賦政

上詳巡一  
享祀飲嘗百神爰始賦政授務

崔駰北巡頌裡潔

于人

陳詩

觀禮

上詳巡一  
于岱嶽乙酉觀禮于魯而休齊焉

張衡巡狩誥帝將狩

風行

雨施

上詳巡一  
允天覆而無遺壯雲行之博惠淑雨施于

崔駰南巡頌惟休蒸之鴻德

庶黎

天動神行

崔駰東巡頌三軍震激羽騎火烈天動雷震隱隱麟麟又北巡頌雍容

清廟謚爾無虞垂拱穆穆神行化馳

四維五載

俱詳

祀四嶽柴

三辰

上詳巡一下見馬融東巡頌

巡東作秩西成

崔駰北巡頌登中山天帝

觀神農將省陽穀相天功巡東作又西巡頌惟秋穀既登上將省畝平秩西成巡畿于西郊因斯萬物凝德綏俗昔既春遊今乃秋豫審銓衡同律度並詳祀五帝裡

六宗

上詳巡一下詳馬融頌

備天官運法駕

上見班固東巡頌下見南巡

頌

脩五禮問百年

並詳

宣聲教撫黎元

上詳後漢

章帝巡幸詔見巡一宋孝武巡幸賑恤詔夫足踐目見實尊天命毗俗未同其化幽隱不得其所故降省風

俗躬撫

黎元

同遐邇

察風俗

上詳宣聲教  
巡狩省風俗詔朕奄一天

宋孝武帝

下當沿時省方觀察風俗外  
詳考舊典以副側席之懷也

歲習

時巡

左傳歲習  
其祥祥習

則行注五年五卜皆吉則  
行下見虞書詳巡一

乘龍

膳犢

展帝功乘六  
龍禮天子

遠諸侯諸侯膳  
以犢貴誠也

卜征

示禮

左傳曰先王卜征五年  
注先巡五年而卜吉凶

也征巡狩也成有岐陽之蒐  
穆有岐山之會皆示諸侯禮也

習禮

展功

又曰諸  
侯有王

王有巡狩以大習習之注大  
習朝會之禮下詳乘龍注

順動

偽遊

將順其動  
無逆于時

漢高祖偽遊

撫萬邦

視三老

書成王撫萬邦巡  
侯甸每巡狩皆

雲夢擒韓信

歲視三老三公致仕之老明其  
三德三德者至德孝德敏德也

設榼

共人門

禮周

掌舍掌王之會同之舍設棨栳再重注  
棨栳行馬也 又云無宮則共人門

設轅設旌

省耕省斂

又曰設車宮轅門  
為帷宮則設旌門

增中四時出 十二歲

巡

上見白虎通詳巡一 周禮夏官大行人王之所以  
無邦國諸侯者歲徧存三歲徧類五歲徧省七歲屬

象胥諭言語協辭命九歲屬瞽史諭書名聽聲音十有  
一歲達瑞節同度量成牢禮同數器脩法則十有二歲

王巡狩

觀河受圖

浮江射蛟

見帝王世紀詳巡一  
見漢書詳巡一

殷國

旗建天子

樹封大夫

見摯虞新禮儀詳巡一  
見秦紀詳巡一

羣鶴

留止

黃鵠翱翔

見漢武紀詳巡一  
見漢章紀詳巡一

堯山立祠

都

亭下車

見三齊畧記詳巡一  
見蔡邕獨斷詳巡一

原上順天時

旁求人

瘳 西成之望既登 東巡之禮斯備 述邦畿以省  
方 觀仁風而展義 明黜陟之分則有巡功 崇望  
秩之儀是稱展義

巡狩三

原詩宋范蔚宗樂遊應詔詩曰軒駕時未肅文園降照  
臨流雲起行蓋晨風引鑾音 梁沈約侍遊方山應詔  
詩曰清漢夜昭晷扶桑曉陸離發歌樅陽下建羽朝夕  
池攬金浮水若聲蹕映山祇一霑九霄露藜藿終自知

北齊袁爽從駕遊山詩曰天遊響仙蹕春望動神衷

澗水含初溜山花發早藂玉輿明淑景珠旗轉瑞風平

原與上路佳氣遠葱葱周明帝還舊宮詩曰玉燭調

秋氣金輿歷舊宮還如過白水更似入新豐秋潭清晚

菊寒井落疏桐舉杯延故老今聞歌大風隋煬帝還

京師詩曰東都禮儀舉西京冠蓋歸是月春之季花柳

相依依雲蹕清馳道雕輦御晨暉嘹亮鏡笳奏歲蕤旌

旆飛後乘趨文雅前驅勵武威李德林從駕巡遊詩



曰大夏堯遺俗汾河漢豫遊今隨龍駕往還屬雁飛秋  
天行肅輦路日御翼華輶朝乘六氣輦夕動七星遊谷  
靜禽多思風高松易秋遠林才有色遙水漫無流京華  
佳麗所目極與雲浮但覩凌霄觀詎見望仙樓鏢門皆  
秀發鴛池盡學優待君草封禪東山觀射牛 又從駕  
還京詩曰至仁文教遠惟聖武功宣太師觀六義諸侯  
問百年玄覽時乘隙訓旅次山川鎮象屯休氣華蓋翼  
飛煙鼓奏千人響旗動七星連峻嶺戈回日高峯馬煦

天姑射神遊罷蕭關獵騎旋更待東山上看君巡狩篇

薛道衡從駕天池應詔詩曰上聖家寰宇威略振邊

陞八維窮眺覽千里曳旌旗駕黿臨碧海控驥踐瑤池  
曲浦騰煙霧深浪駭鯨螭 又從駕幸晉陽詩曰省方

遵往冊遊豫叶前經金吾朝戒道校尉晚巡營重巖下  
飛騎絕浦度連旌澗水寒逾咽松風遠更清方觀翠華  
反簪筆上云亭 虞茂奉和幸太原輦上作應詔詩曰

唐巡光帝則夏豫穆宸儀珠旗揚翼鳳玉獸儼丹螭流

吹和春鳥交弄拂花枝 虞世南和幸江都詩曰南國

行周化稽山秘夏圖百王豈殊軌千載協前謨肆覲遵  
時豫順動悅來蘇安流進畫舳戒道翼金吾龍旂煥辰  
象鳳吹溢川塗封唐昔敷錫分陝被荆吳沐道咸知讓  
慕義久成都冬律初飛管陽鳥正銜蘆嚴飈肅林薄暖  
景澹江湖鴻私浹幽遠厚澤潤凋枯虞琴起歌詠漢筑  
動巴歛多幸霑行葦無庸類散樗 又和至壽春應令  
詩曰瑤山盛風樂南皮務逸遊如何事巡撫民瘼諒斯

求文鶴揚輕蓋蒼龍飾桂舟泛沫縈沙嶼寒漸擁急流  
路指八仙館途經百尺樓眷言昔遊踐回駕且淹留後  
車喧鳳吹前旌映綵旒龍驂駐六馬飛閣上三休調諧  
金石奏歡洽羽觴浮天文徒可仰何以廁琳瑯 虞世  
基和幸江都詩曰巡遊光帝典征吉乃先天澤國翔宸  
駕水府泛樓船七萃榮長薄三翼亘通川夙興大昕始  
求衣昧旦前澄瀾浮曉色遙林捲宿煙晨霞稍含景落  
月漸虧弦回塘響歌吹極浦望旌旃方陪覲東后登封

禪肅然 唐太宗重幸武功詩曰代馬依朔吹驚禽愁

昔藂況茲承眷德懷舊感深衷積善欣餘慶暢武悅成  
功垂衣天下治端拱車書同白水巡前迹丹陵幸舊宮  
列筵歡故老高宴聚新豐駐蹕撫田畯回輿訪牧童瑞  
氣縈丹闕祥煙散碧空孤嶼含霜白遙山帶日紅於馬  
歡擊筑聊以詠南風 上官儀和過舊宅應詔詩曰石  
闕清晚夏旋輿御早秋神麾颺珠雨仙吹響飛流沛水  
祥雲汎宛郊瑞氣浮大風凝漢筑藂煙入舜球翠梧臨

鳳邸滋蘭帶鶴舟偃伯歌元化扈蹕頌王遊遺簪謬昭  
獎珥筆荷恩休

原賦漢揚雄甘泉賦曰孝成帝時客有薦雄文似相如  
者上方祀甘泉泰畤雄從上甘泉故述斯賦惟漢十世  
將郊上元乃命羣僚星陳而天行詔招搖與太陰兮伏  
鉤陳使當兵八神奔而警蹕兮飛蒙茸而走陸梁焱駭  
雲迅奮以方攘半散照爛粲以成章於是帥爾陰閉雪  
然陽開流星旌以電燭兮咸翠蓋而鸞旗凌高衍之崧

縱兮超紆譎之清澄據軫軒而周流兮忽軼軋而無垠

翠玉樹之青蔥兮騁馬犀之璘璫歷倒影而絕飛梁兮

浮蟻蠓而撇天曳紅采之流離兮颺翠氣之宛延排玉

戶而颺金鋪兮發蘭蕙與芎藭靡薜荔而為席兮折瓊

枝以為芳吸青雲之流瑕兮飲若木之露英集乎禮神

之圃登乎頌祇之堂攀璇璣而下視兮行遊目乎三危

玉女亡所眺其清矚兮宓妃曾不得施其娥睂於是欽

柴宗祈燎薰皇天焦蒸焜上配蒸四施選巫咸兮叫帝

閣開天庭兮延羣神於是事畢功弘回車而歸度三巒  
兮偁棠梨天閭浹兮地垠開八荒協兮萬國諧登長平  
兮雷鼓礚天聲起兮勇士厲雲飛揚兮雨霽霈于胥德  
兮麗萬世亂曰崇崇園丘隆隱天兮增宮參差駢嵯峨  
兮上天之緯杳旭卉兮聖皇穆穆信厥對兮來祗郊禋  
神所依兮輝光炫耀降厥福兮子子孫孫長無極兮  
又幸河東賦曰其三月將祭后土上乃率羣臣橫大河  
湊汾陰既祭畢登歷觀陟西岳以望八荒迹殷周之墟



眇然以思唐虞之風雄以為臨川羨魚不如歸而結網  
還上河東賦以勸焉其辭曰伊年暮春將瘞后土禮靈  
祇謁汾陰于東郊乃撫翠鳳之駕馳先景之乘棹奔星  
之流旃彊天狼之威弧奮電鞭驟雷輜鳴洪鐘建五旂  
羲和司日顏倫奉輿樂往昔之遺風兮喜虞舜之所耕  
瞰帝唐之嵩高兮賑隆周之大寧叱風伯於南北兮呵  
雨師於西東參天地而獨立兮廓蕩蕩其無雙

原頌後漢班固東巡頌曰竊見巡狩岱宗柴望山虞崇

祀明堂上稽帝堯中述世宗遵奉世祖禮儀備具動自  
聖心是以明神屢應休徵乃降不勝狂簡之情謹上岱  
宗頌一篇曰若稽古在漢迪哲聿脩厥德憲章丕烈翽  
六龍較五輅齊百僚陶質素命南重以司歷厥中月之  
六辰備天官之列衛盛輿服而東巡 又南巡頌曰惟  
漢再受命系葉十一協景和則天經郊高宗光六幽通  
神明既禘祖于西都又將袷于南庭是時聖上運天官  
之法駕建日月之旃旌 後漢崔駰東巡頌曰伊漢中

興三葉於皇維烈允廸厥倫纘王命脣漢勲矩坤度以  
範物規乾則以陶鈞於是考上帝以質中總列宿於北  
辰開太微敞禁庭延儒林以咨詢岱岳之事于時典司  
耆耆載華抱實徵爾而造曰盛乎大漢世增其德惟是  
岳禮久而不脩此神人之所慶幸海內之所想思頌有  
喬山之征典有祖岳之巡時邁其邦民斯攸勤不亦宜  
哉乃命太僕訓六駟閑路馬戒師徒於是乘輿登天靈  
之威路駕太乙之象車升九龍之華旗建翠霓之旌旄

裒胡考之元老賞孝行之峻農 馬融東巡頌曰允迪

在昔紹列陶唐殷天衷克搖光若時則運瓊衡敷六典  
經八成肆類乎上帝實柴乎三辰禋祀乎六宗祇燎乎  
羣神遂發號羣司申戒百工卜筮稱吉著龜襲從南征  
有時馮相告祥清夷道而後行曜四國而揚光展聖義  
于巡狩喜圻時而詠八荒指宗岳以為期固岱神之所  
望散齋既畢越異良辰棖樞增構烈火燔然暉光四煬  
焱爛薄天蕭香肆升青煙習雲珪璋戕戕犧性潔純鬱

聖宗彝明水玄尊空桑孤竹咸池雲門六八匝變神祇  
並存

原誥後漢張衡東巡誥曰惟二月初吉帝將狩于岱嶽  
展義省方觀民設教丙寅肫率羣賓備法駕以祖于東  
門屆于靈宮是日也有鳳雙集于臺壬辰祀上帝于明  
堂帝曰咨予不材為天地主慄慄翹翹百僚萬幾心之  
謂矣孰朕之勞上帝有靈不替朕命誕敢不祇承凡庶  
與祭于壇墠之位者曰懷爾邦君寔願先帝載厥大宗

以左右朕躬羣臣曰帝道橫被旁行海表一人有難萬  
民賴之從巡助祭者茲惟嘉瑞乃歌曰皇皇者鳳通玄  
知時萃于山趾與帝邀期吉事有祥惟漢之祺帝曰朕  
不敢當亦不敢殺天之吉命

御定淵鑑類函卷一百五十八

謹案卷一百五十七第二十六頁前八行坻場染  
屢刊本坻訛游據文選改

卷一百五十八第四頁前八行陳雒陽都亭前街  
上刊本都亭訛亭都據蔡邕獨斷改







總校官庶吉士 臣 張能照

校對官檢討 臣 王福清

騰錄監生 臣 楊愈柳

騰錄監生 臣 王 詔